

Dr. Musli Vërbani

**DËSHIROJ
TË JEM
AI QË NUK DUHET
TË JEM**

Kaçanik, 2007

Autor:

Dr. Musli Vërbani

Titulli:

DËSHIROJ TË JEM AI QË NUK DUHET TË JEM

Korrektor:

Burim Bunjaku

*Radhitja kompjuterike
dhe kopertina:*

Mumin Shehu

Shtypi:

“Verana”, Prishtinë

Të drejtën e ribotimit e rezervon autori.

Prishtinë, 2007

أنا أريد أنت تريد و الله يفعل ما يريد

**“Unë dëshiroj,
ti dëshiron,
Allahu vepron
atë që Ai vetë dëshiron”.**

(Hadith Kudsij)

Parathënie

Lexues të nderuar, librin me poezi të cilin e keni në dorë është libër në të cilin jam munduar t'i shprehi ndjenjat dhe dëshirat e brendshme të një individi, të një pjese të shoqërisë, të një shoqërie të një sistemi etj, etj.

Nuk ka dyshim se njeri dëshiron diçka edhe pse atë që e dëshiron është në dëm të tij; një pjesë e shoqërisë shkon në një drejtim, i cili nuk është i dobishëm për ta, një shoqëri në një kohë të caktuar pranon dhe vepron diçka, që më vonë e sheh se atë që e ka pranuar nuk ka qenë e drejtë, para si individi një pjesë e shoqërisë, por edhe shoqëria ndonjëherë, për shkak të rrethanave të ndryshme dëshiron diçka, por ajo dëshirë nuk është zgjedhje e problemit, por ndërlikim edhe më i madh i problemit.

Njeriu është krijuar të besojë dhe të adhurojë Krijuesin, mirëpo ai e dëshiron pabesimin edhe pse besimi është shpëtim për të. Ka njerëz të cilët dëshirojnë vetëm jetën e kësaj bote, e jo të botës tjetër edhe pse kjo botë është e përkohshme e bota tjetër është e përhershme. Nuk ka dyshim se Allahu dëshiron për njerëzit të fitojnë botën tjetër, mirëpo ka prej tyre që e dëshirojnë vetëm pasurin e kësaj bote.

Në të gjitha detyrat dhe obligimet për njeriun Allahu ka dëshiruar lehtësim, e jo vështirësim, mirëpo prapë se prapë ka prej njerëzve, që ia vështirësojnë vetes jetën e tyre. Allahu dëshiron paqe dhe qetësi mes njerëzve, ndërsa shejtani dëshiron të krijojë armiqësi me tyre.

Zoti i Lartmadhëruar ka krijuar njeriun dhe gjithësinë; njeriut ia ka dhënë mendjen për t'i pranuar këshillat, ka dërguar peygamberë dhe ka zbritur libra, e prej librave Kur'anin fisnik, i cili është këshillë për gjithësinë dhe njerëzit, por njerëzit prapë se prapë i duan këshillat e këshilltarit satanik, e jo këshillat e Allahut.

Allahu dëshiron që njeriu të jetojë i qetë, të ketë moral dhe nderë tek njerëzit, por prapë se prapë ka njerëz të cilët dëshirojnë të përhapin imoralitetin në mesin e besimtarëve.

Çdo rrugë, e cila i ka shenjat, nëpërmjet shenjave mund të arrish te caku, i cili dëshiron, ndërsa rruga pa shenja, pa udhëzime dhe pa këshilla të shpie në humbje, dhe në humnerë.

Ndoshta rruga e vështirë të sjellë lumturi, e rruga e shfrenuar të sjellë fatkeqësi. Ka çështje e cila në shikim të parë duket jo e mirë, por përfundimi është i mirë, por ka çështje, që në shikim të parë duket e mirë, por përfundimin e ka të keq. Çështjet shikohen sipas përfundimit dhe rezultatit, e jo sipas pikënisjes dhe fillimit. Zoti i Lartmadhëruar na tregon se në Xhehenem banorët e zjarrit sa herë që dëshirojnë të dalin prej zjarrit kthehen në të.

Lusim Allahun që të dëshirojmë të mirën dhe të jemi prej banorëve të Xhenetit, e në këtë botë të dëshirojmë atë që duhet dëshiruar, e jo atë që nuk duhet dëshiruar.

Dr. Musli Vërbani

18.05.2007

KAPITULLI I PARË

PABESIMTARI

Dëshiroj pabesimin
në vend të besimit
edhe pse besoj se jam,
besoj se nuk jam.

Dëshiroj errësirat
në vend të dritës,
edhe pse jam në dritë
jetoj në errësirë.

Dëshiroj vetëm këtë botë
në vend se edhe botën tjetër,
edhe pse në të jetoj
do të dëshiroj të mos kem jetuar.

Dëshiroj rrugën e vështirë
në vend të rrugës së lehtë,
edhe pse rruga e drejtë është e qëndrueshme,
e jo e drejta e paqëndrueshme

Dëshiroj zjarrin e xhehenemit
në vend të të mirave të xhenetit,
edhe pse xheneti
është kënaqësi e vërtetë dhe qetësim për mua.



KOMUNISTI

Dëshiroj të fiki dritën e Allahut,
e vet të jetoj në errësirë.

Dëshiroj
që interesin shoqëror
ta shfrytëzoj për interes personal,
e çdo gjë që është e huaja
të kem të drejtë ta marrë.

Dëshiroj
të bëhet i varfër çdo kapitalist,
e i pasur unë si komunist.

Dëshiroj që me opium
t'i pranojnë idetë e mia,
e t'i vë në gjumë,
e të them se feja është opium.

Dëshiroj
që partia komuniste të hyjë në çdo shtëpi,
e pastaj jashtë të mos jetë ajo parti.

Dëshiroj
të punoj ç'të dua,
të mendoj ç'të dua,
të burgos kë dua,
të injoroj kë dua,
e të gjithë
të mendojnë mirë për mua.



HIPOKRITI

Dëshiroj
kur të jem me ty
të flas çka dëshiron ti,
e kur t'jem me tjerët
të flas për të tjerët.

Dëshiroj
që kur të buzëqeshi
nga goja të më del helmi,
e helmi të mos shihet,
e te tjetri të ngulitet.

Dëshiroj
që të mendoj ithët,
e të flas ëmbël,
e fjala e ëmbël
të jetë vetëm ëndërr.

Dëshiroj
të flas keq,
e të mos hetohet
të veproj keq,
e të mos shihet.

Dëshiroj
që të gjithë t'më shohin
ai që nuk jam,
e unë të mos jem
ai që jam.



PËRGOJUESI

Dëshiroj
t'i njoh tjerët,
e të mos e njoh vetveten
të di gjithçka për tjerët,
e asgjë për veten

Dëshiroj
të tjerët t'i përgoj,
e ata të më lavdërojnë
të tjerët t'i gënjej,
e ata t'më flasin drejtë.

Dëshiroj
të merrem me punët e tjerëve,
e t'mos kam kohë për vete
të shoh gabimet e tjerëve,
e vet të fundosem.

DËSHIROJ

Dëshiroj të ndihmoj,
duke mos ndihmuar
të jap,
duke mos dhënë
të punoj,
duke mos punuar
të jem i ditur,
duke mos mësuar
të kem pasuri,
duke mos punuar.

Dëshiro të kem gjithçka
pa bë asgjë fare.
të jem mbi të gjithë
pa e merituar fare.

Dëshiroj të punoj
duke mos punuar,
e të jem fjetur
duke qenë zgjuar.

BESIMTARI INJORANT (XHAHIL)

Dëshiroj
të vesh pantallona të shkurtra,
e të mbaj mjekër,
e të thonë për mua
se jam musliman i përkryer.

Dëshiroj
të shëtis në çdo anë,
e të shoh vërdallë
të tjerët të ma kenë lakmi
se unë veç jam xhenetli.

Dëshiroj
t'i urrej kryelartët,
e vetë të jem më i larti
të flas për mëshirë,
e të jem kokëfortë e i pamëshirë.

Dëshiroj
plakut t'i them: s'e ke mirë,
moshatarit: ti je kafir,
e të voglit, nëse nuk je me mua
nuk të dua, e në xhehenem ke për të shkuar.

Dëshiroj
dijetarët mos t'i respektoj,
se ata edhe pse janë dijetarë prapë nuk dinë,
e unë edhe pse nuk di
jam i ditur sa s'ka mahi.



PATRIOTI

Dëshiroj
të jem ushtar
pa rrokë armë në dorë,
e të jem luftëtar
pa shkuar fare në front.

Dëshiroj
të çliroj vendin
pa qenë ushtar,
e ta largoj armikun
duke e afruar më pranë.

Dëshiroj
të dua atdheun
pa qëndruar në të,
e ta dua popullin tim
pa e folur gjuhën e tij.

Dëshiroj
të përfitoj çdo gjë
pa sakrifikuar asgjë,
e t'më thonë patriot
vetëm se e dua këtë titull.



I PASURI

Dëshiroj
të jap pak,
e të mendojnë se kam dhënë shumë,
e pastaj të thonë
se jam dorëlibër e bujar.

Dëshiroj
pasuria të më shtohet,
e unë të krenohem,
dhe sa më shumë të kem
prapë të shumëfishohet.

Dëshiroj
të kem kodra ari,
e të ngjitem lart,
e nga majat e larta
në tokë të rrëshqas.

Dëshiroj
atë që nuk di të dëshiroj
se gjithë çka kam,
nuk di sa kam,
e nuk është e imja edhe pse e kam.

Dëshiroj të di
atë që nuk mund ta di,
e të kem
atë që nuk mund ta kem,
e të arrij atë që nuk mund ta arrijë,
e të arrij të paarriturën.
por jam i zhytur në borxhe e halle,
e ushqimin e mirë
se tretë barku fare.



I VARFËRI

Dëshiroj
të mos punoj,
e tjerët të më ndihmojnë,
e ata që më ndihmojnë
të tjerëve mos t'u tregojnë.

Dëshiroj
të kem pasuri,
e tjerët mos ta dinë
se nëse e kuptojnë
më, nuk më ndihmojnë.

Dëshiroj
të tjerët ti mashtroj,
e të mos më kuptojnë
që gjithmonë të jem i varfër,
edhe nëse bëhem i pasur.

TREGTARI

Dëshiroj
të shes pak,
e të fitoj shumë,
e sa fitoj
mos ta dijë askush.

Dëshiroj
që të gjithë të vinë të blejnë te unë,
e te të tjerët të mos shkojë askush.

Dëshiroj
të blejë pa pare,
e të she me pare.
të marr hua,
e të shes me t'gatshme.

Dëshiroj
ta shtij mallin pa tatim,
e të mos i ndihmoj shtetit,
e shteti t'më ndihmojë
çdo rrugë ta kaloj.

STUDENTI

Dëshiroj
në fakultet të shkoj
studimet t'i filloj,
e kurrë mos t'i përfundoj.

Dëshiroj që unë të ligjëroj,
e profesori të më dëgjoj
që unë të diktoj,
e profesori të shkruaj.

Dëshiroj
që në provim të shkoj
para profesorit të qëndroj,
e provimin të kaloj,
edhe pse nuk mësoj.

Dëshiroj
të jem më i pasur se profesori,
e më i ngritur se dekani,
e më i dalluari në fakultet,
edhe pse askush nuk më njeh.

ADOLESHENTI

Dëshiroj të kem dashnore
për t'u mos u martuar,
të kem bashkëshorte
pa qenë i bashkuar.

Dëshiroj të martohem
me grua me sy të bukur,
edhe pse s'më sheh,
e të gjithë atë e shohin.

Dëshiroj të bashkohem
me grua me duar të buta,
edhe pse s'më ledhaton,
e të tjerët e prekin.

Dëshiroj të kaloj jetën
me grua buzë kuqe,
edhe pse kurrë nuk i prek,
e nga goja ajo qet helm.

Dëshiroj të kem pranë
gruan me faqe si mollë,
edhe pse s'më do,
e tjerët i përqafton.

Dëshiroj të kurorëzohem
me grua që ka belin e hollë,
edhe pse të tjerët
gjithmonë e shikojnë.

Dëshiroj bashkëshorte
me këmbë të bukura,
që të mos rri në shtëpinë time,
por gjithmonë në udhëtime.



ADOLESHENTJA

Dëshiroj
të parfumohem me erë të mirë,
e tjerët t' mos e ndiejnë
të eci e zbuluar,
e të jem e moralshme.

Dëshiroj
të mos mbulohem,
e tjerët të mos ma shohin trupin
të mos vë shami,
e tjerët të mos më shikojnë me sy.

Dëshiroj
të eci kokëlarte
kur të tjerët ecin kokulur,
e të eci kokulur
kur të tjerët ecin kokëllartë.

Dëshiroj
të dukem e sjellshme
kur jam e pandershme,
të jem e shfrenuar,
e të mos jem e shkurorëzuar.

RREGULLUESI

Dëshiroj të më do
atë që nuk e dua.
e të më nderoj
atë që e nënçmoj.

Dëshiroj të shkatërroj
duke thënë se jam duke rregulluar,
e të robëroj
duke thënë se jam duke çliruar.

Dëshiroj të më thonë se jam i drejtë
kur unë të veproj me padrejtësi,
e të mendojnë se jam i mëshirshëm
kur unë të jem i pamëshirshëm

Dëshiroj të tradhtoj
e tjerët t'më besojnë,
e të them ç'të dua,
e tjetri, asnjë fjalë për mua.

Dëshiroj që padrejtësia ime
të jetë drejtësi,
e drejtësia e tjetrit
të quhet padrejtësi.

MODERNISTI

Dëshiroj të lavdërohem
për atë që nuk kam punuar,
e të mos dënohem
për atë që kam vepruar.

Dëshiroj të përhapim imoralitetin
nëpërmjet moralitetit,
e të jem i moralshëm
duke vepruar turpshëm.

Dëshiroj të pasurohem
në kurriz të tjetrit,
e të varfëroj tjerët
me pasurinë e tyre.

Dëshiroj të vishem bukur
e nga brendia të jem i padukur,
të them se jam transparent
atëherë kur askush asgjë s'më sheh.

IMITIMI I VERBËR

Dëshiroj
të vishem si bashkëkohorë,
e të mos punoj,
se modën më të re
së tepërmi e dëmtoj.

Dëshiroj
që të zhvillohem ekonomikisht
duke përvetësuar kulturë shkatërruese,
e të forcohem fetarisht
duke i shkatërruar bazat e fesë.

Dëshiroj
të kem jetë komode
pa u lodhë fare,
të kem apartman
pa hy në të kurrë.

Dëshiroj të kem industri
pa ditur të punoj në të,
të kem restorante e kafiteri,
të pushoj në të, pa qenë i lodhur fare.

Dëshiroj të jetoj si ndonjë artist
pa ditur aktrim,
e çdo gjë që shoh në TV
t' i bashkëngjitëm verbërisht.



MEDITUESI

E dëshiroj këtë botë
Në të të jetoj gjithmonë,
Por nëse vdes
Të mos ringjallem asnjëherë.

Por, nëse ringjallem përsëri
Për veprat e mia të mos jap llogari,
Dëshiroj të mos e kuptoj vdekjen,
Edhe pse shoh
Se për çdo ditë njerëzit vdesin.

Dëshiroj
Që jeta ime të jetë e kotë,
E unë të kënaqem në të,
E vdekja ime të jetë tretje,
E emri im t'kujtohet gjithmonë.

Unë kujtoj
Atë që nuk di të kujtoj,
Se mendja ime
Nuk është në trurin tim.

ILUZIONISTI

Dëshiroj
Të ndërtoj
Duke shkatërruar,
E të rregulloj
Duke çrregulluar.

Dëshiroj
Të jem i kulturuar
Duke u degjeneruar,
Të jem i moralshëm
Duke ç'moralizuar.

Dëshiroj
Të eci përpara
Duke ecë mbrapa,
E të shoh të ardhmen
Duke ecë symbyllur.

Dëshiroj
Që t'i kem të gjitha
Pa u munduar fare,
E të mos mungojë asgjë
Pa u munduar aspak.

POLITIKANI

Dëshiroj të votojnë për mua
Edhe nëse nuk më duan,
E unë të mos punoj për ta,
Edhe pse më kanë votuar

Dëshiroj që
kur ta them rrenën
Të tjerët të mendojnë,
se e kam thënë të vërtetën.

Dëshiroj që kur të premtoj
Mos ta realizoj,
Se premtimi im është iluzion,
E iluzioni në kokat tuaja të qëndrojnë.

Dëshiroj mediat t'i kem në dorë,
E me ta të bëj ç'të dëshiroj
Që gjithmonë të flas për moral,
E moralin në thelb ta shkatërroj.

Dëshiroj që gazetatat ditore
Për çdo ditë të shkruajnë për mua
Atë që kam punuar,
E atë që nuk kam punuar.

Dëshiroj të flas për politikë,
E të tjerët këtë fjalë mos ta dinë
Që unë me politikë t'i mashtroj ata,
E ata me politikë të mos më mashtrojnë mua.



KANDIDATI

Dëshiroj
Të votojnë për mua
Edhe nëse nuk më duan,
E unë të mos punoj për ta,
Edh pse më kanë votuar

Dëshiroj
Që kur flas të më dëgjojnë,
E kur t'kërkojnë diçka prej meje
T'u them se nuk kam kohë,
Se unë për ju po punoj.

Dëshiroj
Që unë të marr karrige,
E me të, kush është kundër meje
T'ia thyej brinjët,
E kush është me mua
Të mos guxojë të lëvizë.

Dëshiroj
Që kur t'i fitoj votat
Të them se unë kam fituar,
E jo, pse ju më keni votuar,
Por unë vetë e kam merituar.

Dëshiroj
që t'ju them se nuk e dini
se sa vështirë ne e kemi,
po mos t'kishim qenë ne,
ju, as të drejtën e votës nuk do ta kishit.



DEMOKRACIA

Dëshiroj
Të jem diktator e aristokrat,
E tjerët të mendojnë se jam demokrat.

Dëshiroj
Të di çdo gjë për ty,
E ti asgjë për mua.

Dëshiroj
Që ti të jesh i sinqertë me mua,
E unë i pasinqertë me ty.

Dëshiroj
Që ilegaliteti im të quhet legalitet,
E legaliteti yt ilegalitet.

Dëshiroj
Që të të kontrolloj në çdo kohë,
E unë të jem i pakontrolluar.

Dëshiroj
Që në emër të demokracisë
T'i arrijë qëllimet e mia,
E në emër të demokracisë
Të të okupoj,
E në emër të demokracisë
Të të robëroj,
E në emër të demokracisë
T'i shkeli të drejtat e tua,
E ti të mos i cenosh të drejtat e mia.



KAPITULLI I DYTË

PËRFUNDIM

Dëshiroj
Që të mos kisha dëshiruar
Atë që kam dëshiruar,
Sepse kisha qenë i humbur
Kur kam menduar se jam i udhëzuar.

Kam qenë i varfër, jo durimtar
Më vonë i pasur, jo falënderues
Kam qenë injorant ashtu siç kam dëshiruar
Po ashtu student studimet kurrë pa i përfunduar.
Kam qenë tregtar gënjeshtar,
Kam jetuar në iluzione për të pasur gjithçka
Hipokrizia ime ka qenë në kulimnacion
Kam dashur të jem i pavdekshëm,
E çdo kush të më lavdërojë
Jam marrë me politikë,
E kam imituar verbërinë
Kam dëshiruar të jem, e jam bërë komunist,
E pastaj më vonë u bëra kapitalist,
Po shpejtë kaluan vitet,
E u bëra demokrat
Që t'u them të tjerëve se jam patriot,

Por tani dëshiroj
Atë që duhet dëshiruar
Në rend të parë unë jam penduar,
E dëshiroj që Zoti t' më ketë pranuar
E pas pendimit
Dëshiroj t' i kthehem vetvetes,
E të besoj në të vërtetën,
E vërteta, e cila nuk humbë kurrë
Që unë të jetoj besimtar i sinqertë,
E të vdes me dëshirë
Që jeta ime të ketë vlerë dhe qëllim,
E ai qëllim është të jem adhurues i Krijuesit tim.



PËRMBAJTJA:

PABESIMTARI	11
KOMUNISTI	13
HIPOKRITI	15
PËRGOJUESI	17
DËSHIROJ	18
BESIMTARI INJORANT (XHAHIL)	19
PATRIOTI	21
I PASURI	23
I VARFËRI	25
TREGTARI	26
STUDENTI	27
ADOLESHENTI	28
ADOLESHENTJA	30
RREGULLUESI	31
MODERNISTI	32
IMITIMI I VERBËR	33
MEDITUESI	35
ILUZIONISTI	36
POLITIKANI	37
KANDIDATI	39
DEMOKRACIA	41
PËRFUNDIM	45